

四庫全書

子部

欽定四庫全書

寶真齋法書贊卷十三

宋 岳珂 撰

宋名人真蹟

薛道祖書簡帖

二十一帖並行書第一第九第十
一第十六帖各十二行第二第十

二第十四第十八第十九帖各十行第三第五第
六第八第十三帖各十一行第四帖九行第七第
十七帖各十四行第十五第二十帖各
十三行第十帖二行第二十一帖八行

紹彭頓首移刻伏想尊候萬福適已面叩以左右行期

不遠欲望特給女子寬假今遣人輜去伏冀津遣仍告
許令嗣祕校同過此留宿千萬不阻家人同此懇悃謹
啟不宣紹彭再拜縣君親家母妝閣

韓郎祕校經夕想同廿六娘佳安明黃尅絲淺色紗四
匹繡衣一襲羊酒等送去聊為暖女之儀幸檢留不笑
淺鮮諸留面話不次丈母同此意二十四日紹彭祇白
錢拾緡與廿六娘食錢等用

紹彭頓首啟久跂使車之音不勝馳仰伏審已次近郊

秋暑冒涉良勤恭想尊候萬福如聞朝旨催發不審軒
從入城否幾日在舍館即得出城參候謹先奉手狀諸
留面布不宣紹彭頓首再拜允之提點奉議閣下二十
日

紹彭頓首再拜午刻伏審尊候萬福鄙拙浼清覽乃蒙
貶損翰墨過形寵諭媿慙之至何可勝述謹復手啟上
謝不宣紹彭頓首再拜知府給事執事十六日謹空
紹彭頓首近已奉狀想得呈達到都未得來問思仰不

可言春和伏惟貳政多暇尊履萬福紹彭到都兩月餘
區區如昨會晤何日萬冀若時珍賚以佇光亨不宣紹
彭頓首上啟無逸通守奉議執事二十一日

紹彭頓首比附置兩上狀皆違几格否違閣兩見夏序
思奉博約馳情何涯清和伏惟朱邱餘閒起居萬福紹
彭寡昧天末老親幸安諸不足道何日一笑臨紙耿耿
惟萬萬為時自嗇早踐華要副茲瞻詠為禱謹啟不宣
紹彭頓首再拜宗記室閣下四月一日

紹彭再拜茲者聯姻于傾蓋之際風誼曠厚非流俗可擬衰族之幸以此鄙意成禮之初正賴吾賢者主持今乃承迫于朝旨先行殆非人意所及深用慊慊如聞柅節之地不遠繼得上狀且此為謝不次紹彭再拜

拙者罷官逾年盡室久困桂玉不堪其憂婚禮諸事若得少從簡易為厚幸望以此達令兄及宅中為幸不罪紹彭頓首啟前日過蒙延禮獲款言侍感慰可量漸涼伏審尊履禔福惠示寵和古律二詩得窺哲匠制作欽

服銘佩并深鄙懷區區諸俟面謝使還不宣紹彭頓首
再拜知府給事閣下二日謹空

紹彭頓首再拜昨日奉教賜不果即裁謝經夕伏惟台
候萬福蒙示及三畫謹復歸納復古極少時筆學李成
道寧體者老年不如此專以闢種為主矣淵明粗得典
型但墨淡爾張運判書上呈所求可得否朝夕面啟不
宣紹彭頓首再拜知府給事閣下二十七日謹空

唱和在墨本卷後伏冀照悉紹彭再拜

紹彭再拜田事蒙留念委以皇彥遂漸有主為幸實多
非無逸敦篤垂惻何以致此然皇彥所以為用者賴無
逸爾更望以時提撕之地遠今年秋課無力遣人去且
乞勾收在宅庫因來年遣人去請領次紹彭再拜
皇彥要引約束佃戶今寫去望付之

紹彭頓首啟陽復令辰君子之休伏惟履此亨會坐近
新社紹彭局守所拘不遑前慶伏慙早膺殊寵以副誠
頌謹啟上賀不宣紹彭頓首上啟當時運判戶部節下

至日

紹彭啟違閭多年每深馳仰宋郵縣近始到官忽云與
無逸別久頗不能道左右近日動靜比辰不審尊候何
如紹彭遠官良非所堪奉親到此累月諸幸粗遣手足
在北音問不繼朝夕耿耿無逸才高安可獨浮沉里中
耶紹彭再拜

紹彭頓首得來教後已兩發書達左右否比惟尊候多
福紹彭奉親官下幸安不煩念及會晤未期千萬加愛

加愛偶使人去此數字不次紹彭頓首宗玉記室學士

三月二十二日

要務具于公移非常常者也留念加意為善今日會相
度家產簿依保甲簿式此事必違恐宜慎重欲作無未
便回申即諸州論列五等等第淆亂于簿中為不便明
是非使不知貴臺已如何申報切見教相照應回報貴
無牴牾也何不早出一集佇望佇望紹彭再啟
元均已下引年章訖成甫幾日成行皆先及之也

紹彭啟久不聞動靜下情馳仰何可以言比日不審尊
候何如伏想起居萬福閣別累年曾未邂逅從者嘗入
都否今領何局也未期展晤臨書惘惘秋冷萬萬多愛
多愛不宣紹彭頓首子充通真閣下閏九月十日

大卿尊候康寧眷聚各惟佳安紹彭修書如非幸亦結
局調山東一倅聊藏拙魯也或得邂逅為幸都下有幹
萬萬不外不外紹彭再拜

田僕文字奉煩多矣今再以一角干牒望為達之昔年

為織到鶯綾甚佳欲煩再為織兩匹如何章丘簿租中
納直也

紹彭啟此人還奉狀必達左右冬凜伏想尊候康福自
入上旬日俟使旆而邈無車音何耶傾渴言笑日深馳
結未閒更加厚愛別佇嘉摧不宣紹彭再拜當時運判
戶部閣下十一日晚

紹彭頓首啟專介惠翰益佩春縉騰寒伏惟按臨多暇
尊候萬福承使旆欲出非晚晤見何慰如之未閒尚冀

厚愛以需進擢不宣紹彭再拜當時運判戶部閣下

紹彭頓首拜別逾年每深馳仰至此日跂使旆比方聞
星傳已次蜀境雖瞻風未果詞候有便已極欣悚比惟
艱難蜀道涉履良勞叱馭之餘尊履安吉無緣前造更
冀珍衛不宣紹彭狀上運判考功閣下二十五日

紹彭再拜都城之別容易十載冀南斗北致疎記室之
問去冬陳法漕經由治部曾貢手訥想徹隸人之眎睽
遠譚塵傾繫良深雲山修阻何當一預清集以釋鄙吝

耶紹彭再拜

右元豐同知樞密院薛公向長子紹彭字道祖書簡帖二十一幅分四卷向帥定武有宋景文公時樂營吏孟水清舊獻游士所攜襖帖石本在公帑刻意模倣積日夜不少置遂得筆法大意後自成一家書名亞海嶽襖石遂歸薛氏大觀間次子嗣昌以內九禁今觀此書字字縱欹有源委而書名皆襖序中彭字體製信手好之篤信之堅與之俱化真積力久回應

爾也昔米芾跋褚河南臨禊帖有曰永和字全呈其
雅韻九觴字備著于清標浪字無異于書名由字益
彰其楷則予于此帖亦云嘉定庚午八月得之中都
高氏書有印文曰三朋圖書合瑞又御府寶章在焉
通他印凡四十所

贊曰崇觀太平博雅彙征秀出簪纓楚芊蜀劉三英
并輒道祖其儔沈浸深醇薰陶見聞厥藝以振方旅
蘭芝水清獻奇發千古機擷其所長韜鋒斂銳類曲

水之觴即權合經不特製名雅韻盡呈溼帶已仙是
書之傳孰探其天風期九咳黃鵠下來然予言哉

薛道祖鵜鳩帖

行書
七行

余家舊有花下一金盆旁一鵜鳩謂之金盆鵜鳩者是
已傾在都城為元章借去久不肯歸余比得巨濟書聞
元章已下世大可痛惜此畫今亦不知流落何處使人
嗟嘆之不足紹彭頓首

右薛道祖金盆鵜鳩帖真蹟一卷是帖實與山谷湯

方疏法同有小璽款縫予嘗攷寶晉山林集云道祖
有花下一金盆盆旁兩鶻鳩謂之金盆鶻鳩豈是名
畫可笑是固以為不然矣而今帖乃謂頃在都城為
元章借去久不肯歸何耶

贊曰朋友之宿草未黃眷眷于舊藏畫史之詆訾未
忘斷斷乎弗償鳩捨枋而下垂鶴唳天而高翔誰能
游九垓以問太虛其必有以別二子之短長也

薛道祖書簡重本三帖

三本共六紙並行書第一
第二第三帖各十二行第

四第五帖各七行內第五帖與
第六帖全無異同故不複出

紹彭頓首啟袞袞短景復以近出岩渠往復幾二千里
久不果修起居之間瞻懷盛德日極馳情冬凜伏惟澄
清餘休尊履寧福密通使臺未遑告謁敢祈珍育以迓
寵休謹奉啟不宣紹彭再拜冲允運判考功閩下十一
月二十七日狀

紹彭頓首啟袞袞短景復以近出岩渠往復幾二千里
久不修起居之間瞻懷盛德日劇馳情冬凜伏惟澄清

餘暇尊履寧福密通使臺未遑造謁願靳珍育以訝寵
休謹奉啟不宣紹彭狀上運判考功閣下十四日

門中上下眷聚乍到殊土想皆安寧鄧京西過洛相見
良款比報得鄉壘亦頗便否米元章到此已得三書其
篤厚故人如此殊可人意也紹彭少煩左右新繁縣王
欽與之有素欲求一職令削諸公偶與無素欲望左右
特與成之其人今年四月替非明公垂意不可望也紹

彭頓首

紹彭少煩左右新繁縣王欽與之有素欲求一職令削
諸公偶與無素欲望左右特與成之其人今年四月替
非明公垂念不可望也紹彭又上

紹彭啟近兩奉書及絹字碑額去當一一得達比日伏
想按部多暇尊候清安嘉節阻奉燕觴不勝馳仰尚祈
珍育以副言願紹彭頓首

右薛道祖書簡重本三帖凡六幅真蹟一卷予于顏
魯公帖疑矣而未有以并故不敢論于蘇長公帖信

矣而未有以據故不敢驗此帖又同而出于御府有
縫璽在道祖之書又決無人偽為紙素復一等于是
益信季茂之言為不可易帖皆牽聯列以繫贊用證
前帖

贊曰帖之疑也非取而并不足以為證非視其印不
足以為信既信矣又何加焉曰一以訂吾友之言一
以貽吾家之傳傷彼苟且祇益可憐於虐昔賢

薛道祖秘閣詩帖

行書六
十四行

訪古求書二十年二王真蹟幾人傳每尋同好得消息
聞韶忘味心拳拳諸家真贋可屈指緹巾入手分媿妍
道山東觀富奇古世人想望如雲天此生塵俗分不到
九重有路來無緣豈知司存預符璽芸臺高議開賓筵
翰林八坐中執法未容凡吏陪諸仙酒闌接武上祕閣
皇居紫禁凌非烟晉唐法書在寶積傍架牙籤一一穿
紫衣黃門許一見忽開復閉嚴關鍵右軍盡善歷代寶
八法獨高東晉賢宏文舊物印章在開元小篆朱猶鮮

草行無窮少真楷硬黃色淨昏麻牋鳳翥龍翔斜復直
烟霏霧結斷還連溟漲筆力老轉劇臨池尚歎張學專
言奴得法號神俊逼人體勢殊翩翩自方家尊騁豪翰
駸駸欲過驂騑前崇虛鷲羣最真蹟萬里古色星日懸
筆乾墨淡不可搨拙手添暈難磨湔小重肥書兩貞觀
每角一字居四邊南朝妙鑿各題檢懷充在後前僧權
爭妍取勢押縫尾磐石臥虎推滿騫琅琊世譜今乃識
寶章十代何蟬聯忠良賊孽無去取茂宏處仲同一編

其間楷真特蕭散南平祕法傳僧虔卷杪題官記年月
方慶疏封在石泉當時盛事今不泯曾看崔序傳遺篇
想見舉朝推好尚小鍾發論頭風痊髹奩別貯古雜跡
歷代作者堪比肩叔懷陳人有晉法伯英漢帖疑吳顛
誠懸送瓜特枯硬歐取方險虞勁圓虞文發願乃合作
壯古適麗功力全世間此帖豈有二孔廟破石人猶憐
阿武章草五字句畫松分行如直弦北難之晨足才致
蛾眉文墨爭嬋娟青綾高標卷二十淳化刻在諸帖先

仲尼夏禹謝太傅山濤漢章西晉宣體凡格陋漫收掇
一手臨寫煩雕鐫二王妙跡半遺落寶章虞柳俱見捐
無鹽刻畫廢西子騏驎不御蹇著鞭永熙聖學貴斯事
討論王著何備員百年文物盛于昔繼文真主方御乾
巖廓道業仰夔禹太平黼藻宗雲淵寶書傳世久未輯
明時盛事猶缺然誰能借辨達聰聽願求精識重評詮
收遺去陋再刊勒鳩工不費數萬錢嗟哉百卷頃刻過
安得放意徐窮研歸來欲說急記取瀛洲回首情悵悵

心存默想尚可記以指畫被夜不眠休論頑仙與才鬼
但得典掌甘終焉

右薛道祖祕閣觀書詩帖真蹟一卷國朝石渠東觀
之盛遂列紫垣流略星分緋素雲委自熙陵右文燕
及崇觀太平偉蹟極于是時公精鑑能書為一代稱
首縱覽其間如后夔涓曠屬耳韶濩音響節奏固有
默會而不容于名言者詩篇之作辭藻雖未稱而翰
墨賞識要不可廢先君以淳熙癸卯將漕鄂渚與總

餉趙汝誼言燕南樓席間出是帖以二英石易得之
有御府紹興印二半印一薛氏印七半印一

贊曰中祕法書之積自淳化至于崇觀富矣而未加
別也翰墨博雅之能自劉米逮于道祖著矣而未多
閱也伯牙之珍百世知音偉奇能之表表本和樂之
悃悃予嘗歎太平之盛際士大夫可以盡其好尚之
心盤薄時清徜徉書淫彼何預于帝力殆有類乎魚
鳶之在天淵各自得以遂其高深也

薛道祖清閔閣詩帖

行書序三十
九行詩八行

四方士大夫宦遊京師類多僦舍往往庫狹湫隘室無
天游容膝而已廳寢廚廡皆苟完苟合能有齋閣為便
燕棲遲之所者鮮矣況有隙地以植嘉卉乎河東三鳳
後人道祖于堂之中庭植叢竹甚茂竹之傍隅榜閣曰
清閔蓋取退之荀添南階竹日日成清閔以名之也松
柏與竹皆有士君子操歷隆冬勁寒不改柯易葉人所
顧玩常與凡草木異然松柏難植而遲茂插根數年其

幹始逾拱把非廣庭盛園詎能多容雖有清陰常踈而不密殆不若竹之易植而速繁也幽軒曲檻在在宜之或臨牖或緣逕始種數竿不閱歲如林清森閱邃蔽映庭戶掃砌拂簷靜若天帝非高竒之士孰能愛哉少陵杜之美達道翁也僑居遠域猶曰平生憩息地必種數竿竹清玩彌劇則復有客至從嗔不出迎之語子美所謂善假物以捐俗情者道祖高意正在是爾若夫炎曦爍石夏雲火蒸道無行車林鳥吞聲觸熱拭汗自公就

寧虛堂停翬靜几卻冰蠅蚋歛跡涼氣自生翛然一榻
由竹而清通津要塗鳧趨鴈萃千百其朋嘒啗如市我
歸吾廬以恬養智繁枝梢雲密葉凝翠隙無塵飛人不
雜至遽然一齋由竹而悶君于是逍遙其間小冠散襟
左圖右書意澹如也有客至則闔扉而飭長鬚曰余方
對此君披黃卷與聖賢語耳客樂此則予通否則予拒
毋俾敗予意文登馬琮嘗叩關款訪君鏗然抽扃晤言
久之遂許觀文房之富因書清閔之寶又繼之以歌曰

虛堂幽幽竹森森直節常便靜者心秋檻風高聲戛玉
夜庭月白影篩金檀藥相對復何有掛壁丹青古名手
飛泉激石湧崖間更愛霜鴻下葦灘錦題玉軸照清閼
甕無一點塵埃氣百尋砌下日相親千畝渭川空自翠
右薛道祖清閼閣詩帖真蹟一卷東華軟紅塵中士
大夫率以是老歲月清閼之樂固所謂濯濯泥中之
蓮超然不染者嘉定己卯夏五月予在郎舍偶得是
詩予鄺鬻者慨想承平之風流恨斯人之不可接也

時寓舍堂下適有藝竹清陰晝繁午暑稍卻覽卷為
之三歎息焉卷有紹興印二半印二薛氏印三半印
一印適與觀書詩相合殆後人裂取而藏者

贊曰此君之清閱昌黎所憇何嘗得其細三鳳之呈
瑞非實不餌亦姑卽其意予陋且蔽嘗竊歎喟謂必
見其真與境契而後可以處絕塵之地而歸對出而
棄十寒而一暴久睽而暫慰則亦何足以得二者之
味詩乎竹乎予將求其所以無愧

薛道祖二花詩帖

行書
七行

鮮鮮中園菊粲粲離東畔的的秋水蓮嫋嫋西風岸迢迢白衣人皓皓涉江腕重陽尊酒親霧夕容光爛物生各有宜不許年華晏

男經孫仲邕永寶

行書
一行

右薛道祖二花詩帖真蹟一卷帖上有御府印蓋先君舊藏得之越之王氏不書歲月

贊曰菊粲粲兮東籬蓮的的兮西風是皆不受夫一

塵之染而特立于九秋之中予固喜其潔清而自全亦以觀其筆之妙而句之工也

薛道祖寄黃魯直詩帖

行書
十行

奉寄魯直學士 紹彭

瘴地經行促棹謳周南太史幾年留書來遙識猶青眼
別久縣知半白頭宋玉又經巫峽去謫仙初罷夜郎遊
長江風水追難及悵望春波一葉舟

男經孫仲邕等永寶

行書
一行

右薛道祖寄黃太史魯直詩帖真蹟一卷建中靖國
初黨禁稍弛太史自我州放還監鄂州市征公此詩
蓋其時也帖亦先君舊藏有一印

贊曰詩以情寄而拳拳乎子姪之示又使之寶而勿
棄亦足以見其得意

薛道祖試劍石詩帖

行書十行
尾批二行

豐沛布衣關內客回首咸秦坐悽惻漫隨霸楚西道遷
未甘漢地山河窄隨身三尺青龍子曾斷當塗素靈死

手提巖上試秋水大石迎風開披靡東歸欲整堂堂陣
吳兒未足勞餘刃炎靈天啟定中原大言成事人方信
君不見不侯飛將能射虎誤中仙山猶飲羽

漢高帝試劍石

道祖八月二十四日寫

右薛道祖漢高帝試劍石詩帖真蹟一卷上著薛氏
印四半紹興印二韓莊敏彥直在溫以書遺先君雜
帖十此其一也石今在漢中

贊曰予嘗登虎丘有石踞然剖而為二攷之傳記亦曰闔廬之劍所試也豈屬鏤之剛與帝斬蛇之佩見之于用若合符契又不知此等通靈之劍何以不復見于後世也或曰帝之鑄劍出于豐沛窮谷之冶投以高宗鬼方之器宜乎其有異予則曰是固神物之天啟用以殲三猾清萬里則固當屬之赤帝之子然亦豈與頑石者爭一剖之利哉予意帝之必不爾也則又曰流言至智者而止予以觀其理

薛道祖馬伏波事詩

行書
九行

人生在衣食但取飽與溫下澤駕款段曾不羨華軒任
為郡掾吏身自守丘園鄉里稱善人此外不足論志大
心自勞福厚禍有根提兵泊浪間蕙苴讒謗喧飛鳶跼
跼墮臥視庫水昏永懷平生時空愧少游音

右薛道祖馬伏波事詩帖真蹟一卷有半印者六先
君在湘南得此帖子成都使者折知常時登湘山觀
閱帖子方六齡先君執卷歎且顧曰小子識之蓋淳

熙戊申之六月噫四十年矣

贊曰款段下澤為郡掾吏不負于善士此先君子之志也而予由謗才蹤取顯美歲遭年除迄負遺旨猶驅馳而不止日月其駛契闊桑梓此其想警效于膝下三歎而繼之以頽泚也

薛道祖白石潭詩帖

行書
十行

輕舟繫石倚蒹葭春後清江便是家蓬底爨烟將稚子

共携漁網曬晴沙 白石潭

非汎汶江所見如此若得妙手據此詩畫出豈非佳境也

右薛道祖白石潭詩帖真蹟一卷予兄吏部君嘗拜賜天下蓋阜陵以其筆札似公此帖蓋兄家物以歸先君者有六印著焉

贊曰畫以有聲著詩以無聲名有聲者道祖之所已知無聲者道祖之所欲為而未能者也

薛道祖茶藤詩帖

行書
五行

野白茶蘼夾路長
迎風不斷挹濃芳
鳳池荀令曾來否
幾許薰鑪敵此香

右薛道祖茶蘼詩帖真蹟一卷
舊與白石潭詩相連
亦有六印予讀此詩頗類晚唐字亦婉逸可喜
因麋之以為贊焉

贊曰夾路濃陰野興長
茶蘼想見競年芳
至今四月花如雪
猶帶河東翰墨香

薛道祖經行詩帖

行書十
四行

辨士祠邊半嶺松不容凡木亂江風筇杖挂到峯頭閣
天籟都歸十八公

水石相迎擊目新兩峯秀色引朱輪使君自比蘭亭後
金字磨崖更幾人

月分圓影委金波峯面無塵瑩不磨應是飛仙梳洗處
碧臺青綬掛雲蘿

右皆仲氏嘗經行之地尚可攷記否

右薛道祖經行三詩帖真蹟一卷公之弟曰嗣昌仕

于宣和光顯矣仲氏豈其人耶此詩亦出于兄家賜帖有六印

贊曰仲氏既不能定其名經行又不能指其地睹奇逸于筆勢想溪山于詩意瞭然景物之皆備又何必吾身之親至也

薛道祖皇華詩帖

草書
三行

橘樹松林綠徑長竹籬縈繞當城隍皇華何異投荒客
已過山川是夜郎

右薛道祖皇華詩帖真蹟一卷詩本附雜帖中而其
文當別出繫以贊而嗣書焉

贊曰遠有光華者固所以送使臣德意之布宣民瘼
之咨詢此遐陬僻壤之望繡斧之光而瞻駟車之塵
詎容自比于寂寞之濱維詩之箴以警駘馱

寶真齋法書贊卷十三

欽定四庫全書

寶真齋法書贊卷十四

宋 岳珂 撰

宋名人真蹟

黃魯直書簡帖上

三卷二十四帖並行書第一第三第九帖各十一行第二第八

第十九帖各八行第四第五第二十三帖各九
行第五第二十帖各五行第六帖十六行第七帖
七行第十第十二帖各十七行第十一帖十行
第十二帖十九行第十三第十四第二十一帖各
十二行第十六帖十八行第十七帖十四行第十
八帖十五行第二十四帖六行內第一第二第三

第五帖各

有外封

庭堅再拜啓欽想風流有日邂逅獲奉緒餘少慰駕往
不肖放浪林泉間已成寒灰槁木尚蒙長者過當愛獲
使立於無悔之地敬佩嘉意無以為喻重辱於教存問
勤懇感激區區來日遂行無緣瞻望惟冀惟冀為國自
壽以須升用庭堅再拜上補之安撫團練老兄閣下
手書上瀘州安撫團練責授涪州別駕黃庭堅謹外封
庭堅再拜庭堅昨於魚洞僦得大舟至戎舟行不甚覺

暑氣至此無可以累左右者所幹止於薪菜魚肉舟中
人可自辦也但欲就一閑寂僧舍中沐浴并治二三種
湯藥備小兒輩乍致焚道或不能其水土耳此聞雷州
行遠雖不深知其故要當相與淡淡於義乃安庭堅再
拜手狀上安撫團練閣下

庭堅謹封手狀上安撫團練閣下庭堅謹外封

庭堅再拜啓春末被旨移戎州謂計日可參候故不復
拜狀而多病就醫藥所至淹留凡三易舟乃得及此比

來不審尊候如何曠早得雨想少慰憂民之意庭堅損
棄漂沒衰疾慵惰久在林麓已無衣冠但有服巾直裰
野人之服恐不可以造公門謹勒手狀承動靜庭堅再
拜上補之安撫團練老兄閣下

庭堅再拜損奉餘出於至意不敢有所擇然公長者矜
給中外用處博矣復以見及抵增愧耳子舍諸郎皆有
英氣他日老夫或有託焉恨不款曲相語也小子相駭
未有知不敢令參待迺蒙齒記感愧感愧庭堅再拜

庭堅再拜比相氣體益康強尚能劇飲否願勤衛生之
經以須不次之用庭堅再拜

手狀上安撫團練閣下庭堅謹封

庭堅再拜不聞嗣音忽逾月區區惟有懷仰即日天氣
亦小寒不審尊候何如伏惟慈惠決于民上下愛敬府
中無訟齋閣但文史歌舞之樂家庭詩禮雍雍肅肅神
之聽之百福所會庭堅衰疾不損杜門有味而萬事隨
緣亦忘衣食之豐約小兒輩稍知讀書有兩道人於此

同齋粥耳有鄉人鄒好先者以鬼谷五命游兩州舊矣
云有緣事至治下故輒附手狀承動靜十一月六日庭
堅再拜上補之安撫團練閣下

庭堅頓首扈縣想常得安問子飛兄弟講學常有日新
之功舍弟云十月初一日王庭秀才船沂流西來殊不
得近育若至治部幸爲趣其行李也庭堅再拜

餘甘乃有一種大者如李其實味甘脆與常見者絕下
類恨今歲亦歇技所得絕少或云深蠻中有之冬至後

乃來常恨餘甘入口苦澁難堪久之乃得味遠不及橄
攬若此一種者乃此一種矣西域傳云餘甘二種大者
生青熟黃小者始終青色蓋信然矣庭堅頓首

庭堅再拜奉別再見秋暑懷仰何日不勤夏中兩上狀
不審皆得徹几下否不雨四十餘日歲事幾失望時兩
三日甚慰人意想貴部亦沾足秋成有望憂民者可以
加飡矣蕭彥和解官去新通判為誰相歡否庭堅寓居
蒙免未緣瞻望臨書馳情伏祈為國自重謹奉上七月

卷十四
十一日庭堅再拜上子正使君大夫閣下

庭堅頓首再拜元仲使君大夫閣下間者往來道出治
部過蒙地主之禮勤重千萬別來懷想何日不動頃至
武昌即留居完葺民屋久之乃小完以是欲修記亦不
暇即日春寒不審尊候何如伏惟宴息暇豫千里按堵
寢食之味神所相勞庭堅以范德儒法當遷居輒欲就
貴部自謀一舍不敢煩公家但不知有貴降宮觀人在
貴州否庭堅已具人船聽悔諭乃發耳此行似有親依

之便望路欣欣謹勒手狀承動靜二月初七日庭堅再
拜上元仲使君大夫閣下

白淨飯想寢食清健阿難難陀輩各安否祝有道性亦
踈逸然常以作佛事為念亦是宿有少香火緣耳亦隨
事令歡喜而行知命得過夔州書後不復有一字記以
小婢又產子於荆南復留滯耳方廣欲更來相見已發
書止渠恐荒寺耒耜未淨不可敷素之來耳兒輩比在
戎州得書甚安庭堅頓首

湘陰蓋甘隻漫助太倉之一粒

庭堅頓首伏奉手誨審瓶錫已判六祖聞開堂日道俗
震動不勝欽仰但猶未有人傳語錄來耳計入院今半
月餘想人事稍稍就緒矣開堂疏出於牽強乃承推獎
過當若不同林臥爭知被裏破只是奉酬說耶霜露果
熟諸聖推出想化緣必齟齬但恐不能得人事清簡耳
知命計數相見聞出入無間頗招當路口語得所事幹
了早還亦佳庭堅城南僦舍既安便凡百不復與公家

相關衣食薄厚隨緣時時杖到人家倦時或經月不出亦自有味恨未得從容耳前令羅富送舒州木及舊雙井到彼不壞否今因江南河客更分新雙井去計院中或有佳嶼也乍寒千萬珍重十月十五日庭堅頓首
六祖禪師菟公道友几下

庭堅頓首以衰朽怯人事不能一到成都甚負佳處登覽然亦是老年漸不喜此曹狡獪耳乃煩輟為人天談道之光陰飄然一來掃地焚香奉侍已數日不知不為

世緣所奪否元監院相隨許時經藏記亦未就但亂寫
得十數軸字歸耳其人曉事幹辦他日若得渠相輔佐
甚善廣之景年及房君所須字各寫得一兩軸并書囊
在戎州不携來須到家乃可遣餘事元能道之又相見
有期不復覩縷八月二十六日庭堅頓首六祖禪師大
知識方丈

庭堅再拜昨在郡中既承使節在遠不敢遣人承問太
夫人然聞耆年耳目聰明飲食如壯者奉助歡喜也今

者到城即當參省雙井今年第一舍弟才進肥送一片
許數分上數兩恐可為老兒一煎也庭堅江州之役舫
挈七弟一房同行勢須得十五來人邑中亦辦數人至
三百里矣恐郡中有買公用人可道江州得三兩人幸
甚或難得亦不固求自可雇人行耳庭堅再拜

庭堅辱教審侍奉萬福為慰竹萌佳會謹以奉旨甘以
成公之德施缺然不得面懷想良勤真老萬福庭堅頓
首上僊民通直仁親

庭堅啓前因三學山化主回奉手狀并漫寄一扇不審
得嫩禪几否頃人自當義來再奉手誨喜承燕居多福
比密師自富義來報成都虛六祖奉侍又壽寧僧宗喬
自成都來云公已受六祖疏計不虛傳輒作短疏助佛
事然老懶不成言語也庭堅寓居處漸完葺內外終不
會省費然厚薄亦隨緣知命欲到成都看藥市此一行
費亦不小亦無處減省耳前所寄諸書甚助荒廢欲隨
事記數句尚未暇惟悅老語錄常在几案間一日緣會

便下筆矣別作一篇竹軒頌似可觀已付密師去可種
竹於六祖即用之或須別寫即寄本來可也所要文字
多寫在密師處不知化緣道路悉存得否秋熱懶倦奉
狀不如禮八月十日庭堅再頓首範公禪師方丈

庭堅頓首昨如化主遣莊夫廻奉書當已徹書几即日
秋候微涼想日用輕安道衆雍肅堂頭賓客不至喧闐
否家兄約八月間自長沙來至零陵度今已到相見否
何子玉來時碾建溪妙錡口口口口度遂否成歸淮得

安居處否院中嚴奉新恩更有所興作否如於此時相見化道頗行也未卜瞻對千萬珍重八月十六日庭堅拜手崇寧長老平公几前

庭堅叩頭別來不復能通書孤苦憔悴之狀不言可喻能中間每見邠老龜父兄弟詩卷中有佳句未嘗不咏歎也辱書累紙恩意勤懇但增感塞參前堂佳句甚高秀欽歎欽參前堂但前對溪山脩竹古木森然而頗助觀已其後夏日皆綠陰不見日耳土木之功則極草草

又堂中之人哀悴廢學甚不稱佳句也太和詩似不必
作有微意己具駒父書幸取觀之未緣會集惟強學自
重謹奉狀不次庭堅叩頭上何君足下

庭堅頓首兩三望車來臨何其寂寂耶雨作遂至極涼
伏想安勝欲煩指揮尋雇兩夫能負擔者往融州因送
王公濟去便得之乃佳去亦不留滯也庭堅頓首成之
秘校

庭堅適蒙誨諭來日會食以李壻女子初一日欲解船

且欲家中相聚願裁照絕早欲往稟所遣至太平州人
也庭堅再拜

庭堅再拜速餉厨醞十器仰荷不忘感載感載王君馬
舟既蒙有開納之意卽當以書喻之所以未至前者此
自重之士不敢輕發耳輒復有一事濶左右舍第筠州
判官公鎮欲覲至雙井遂給事叔父大葬恐左右有驅
使處幸沿檄一歸如可速得檄下卽及事爾率易恐悚
恐悚庭堅再拜

庭堅叩頭今歲鄉中冬雪大寒三白不異北方不審湖
外何如二十六婦縣君侍奉家母太君萬福每蒙垂詢
感戴承車從至潭府議役法已定議否聞李守長者必
允物情役法因令小吏錄示大槩幸甚庭僚又往納婦
得無數為翁費囊中金耳四十五弟比性行稍柔矣亦
得給事院諸孝友第恂恂薰陶使然爾患貓兒頭笋甚
宜湯餅但數承來賜無以為報耳荔子一囊漫助壽樽
古田紙四軸同之輕瀆愧悚庭堅叩頭 女睦兒相並

附起居

庭堅再拜風寒未解不審尊候何如來日欲到承天沐浴每到城常苦人事敗短晷遂不得沐頭欲清旦參候煩為具一飯熱簽羹包子三刀羹淡菜羹飯午前飯畢幸甚或遇方名客卽具已謹狀咨稟率易率易庭堅再拜中玉十三兄金部閣下

庭堅頓首承惠雙梨魁梧長者感刻感刻筆三雙分上不知可手否金波一器納上何必言貸但為糴得白米

則是惠矣庭堅頓首成之祕書

黃魯直書簡帖下

二卷二十二帖並行書第一第八第十帖各十二行第二第八

第十一帖各十五行第三第十二第十三第十四第十八帖各五行第四第七第九第二十帖各十行第六帖七行第十五帖九行外封一行第十六第十七帖各六行第十九帖十三行第二十一第二十二帖各十一行
第二十三帖四行

庭堅頓首前承惠書恩意曲折良恨逾年之別不得一面而兩辱致助之意曲篤義當受賜而公容宜萬里又除累月俸以償雇備想至今未贖故輒歸納幸不肖治

行粗足辦事耳若甚不足相資助亦人情之常非敢為
獨清也願深照此意更希勤官強學以致光大三月八
日庭堅再拜上升之主薄仁親

庭堅再拜啓沙夏來黔中大暑幾不可堪又得骨肉到
眼前跛跛挈挈但用過日以是久不通書左右即日秋
熱未艾不審台候何如伏惟懷道宴安閉閣清靜而鰥
寡得其理神明所相寢膳安宜庭堅待罪黔中逾一年
與此方人物皆相安亦粗治生理可衣食十口矣弟姪

單到此百用具足也初列純無書冊今又稍稍集矣亦是於此故紙風有業緣爾呵呵惟是無階修敬不勝馳情謹附承動靜七月二十三日庭堅再拜啓君字知府舍人閣下

默守曹供備于此相顧亦勤勤冬中當代去有俸餘五百千不審貴州能應副否託不肖咨承如蒙垂許方敢作移文也庭堅再拜

風塵表物凡所以發於用者皆足以妙天下也此書雖

元祐間而筆勢已有三昧觀涪翁之言自謂黔中時字
意到筆不到則此書固當不自取也余頗得太平州書
體質老健而豪放韻益奇蓋舟中所見盪漿撥棹候入
之後也此書政足以傳百世尚何安石碎金之足比乎
涪翁蓋抑損云爾李愬

徐剛胡元亮同觀崇寧二年正月二十六日

庭堅再拜啓自博夫下世每欲作書則氣塞以是絕不
通記左右然聞動靜則密亦以此為慰爾老兄博學信

道甚篤泡幻起伏亦可識矣比想漸能愈痛濟理諸人
具知公存心所向計不能久補外行當國門瞻望騎氣
謹上狀庭堅再拜上和叔知府舍人同年兄

庭堅頓首辱手誨喜承體力勝健所雇人甚醇實可喜
但公濟來云卻已雇得兩融人又得高左藏一人來今
連迴甚愧空勞煩也糴粟米少加意庭堅頓首成之祕
校

外甥鴻父得託貴門相與遂有瓜葛良以為慰諸令弟

想講學不倦哀悴昏塞不記貴字欲奉字曰斯舉不知
可用否取論語所謂色斯舉矣者但恐或犯諱字爾因
來示諭陳季常所刻蘇尚書詩集煩為以厚紙印一本
見寄只封在鴻父處亦可爾庭堅上

庭堅叩頭頂有三縣量給雇船錢已具太守牋中承稟
不審以為何如若旦指揮三縣依例施行則未有遭喪
扶護水行朝旨應副葬事者恐須明於指揮爾聞漕臺
亦有意除破無護吞之心也頃蒙差判兵級三十人極

濟泝行李比欲得葬事畢遣回又以卜日在來年正月恐不得久占在公之人試煩頤指諭所司檢會舊例或不可則當盡遣迴亦稟可否於太守牋中矣伏幸裁之私事免洩非一恐及恐及庭堅叩頭上

庭堅再拜弟姪經過貴部過蒙恩卹甚厚感激不勝情也庭堅今夏得伯氏元明及小姪模各到官女子亦從其舅官明州惟高臥對摩圍耳孫子實得兩書并割俸來聞與其僚亦稍睦矣子進有音問否幾時當來寄耦

之想數海陵老人具道之人生行年六十萬事可忘也
願遂意衛生而已庭堅再拜

庭堅頓首五月初三日桂州見陸海問知侍郎台候甚
康健開慰無量奉別忽漫改月懷想何日不勤即日當
入學舍不以遊戲費日稅姪殊有意相依學問願蒙琢
磨之益惟以日新惟念每旬可大半終日提亦蒙益也
尚暑今日方至桂府一二日卽行他日可時通書耳十
萬為親自重庭堅再拜德久佳士九兄

庭堅頓首辱書勸懇審侍奉太夫人吉慶韶州常得安
問為慰子舍得男六十老人初見孫實以自慰遠承致
慶感刻感刻見所惠書字畫詞意皆增于往當是安閒
便靜畫意文字之功想學行皆日新如此不惟交游之
慶韶州聞之寂寥中亦一破顏矣兩小兒日相從蒙益
當不淺未有會面之期臨書懷想千萬自重七月二十
一日庭堅頓首德久賢俊

旦來伏想侍奉萬福語溪銘篆字計篋中乃未有故分

一本去中興頌卻乞一本庭堅頓首德久足下

庭堅頓首風日暄暖伏惟體候增勝早承諭須小史方
令幹少俗事纔來今遣上庭堅頓首子澤判司宣義閣

下

庭堅頓首適屈車駕臨顧甚惠晚刻伏惟體力佳健新
賜茶分上龍鳳各一餅碾試皆不與例賜者同也庭堅
頓首子澤宣閣下

啓上景道十七使君庭堅手封

庭堅頓首辱教并惠酒以助旨甘感佩眷憐之意三紙
早來檢文字方見數日間寫得卽遣上諸院要題字者
當為致妙香卽便作佳跋尾幸諭之也庭堅頓首景道
十七使君

庭堅頓首適自智海浴回已燒燭得所惠教并送郡詠
珍荷珍荷紙甚好來日寫得遣上庭堅頓首景道太博
宗英

庭堅頓首屢屈車騎以多故未果出城一參候辱教并

既羊酒感愧百冗上謝草率庭堅頌首君壽朝奉仁兄
糟醬石耳薄物聊以將遠意輕瀆甚愧從道書信已達
適為渠女子病未取得答幸照譽庭堅頌首

庭堅頌首比得七月半間元明在荆南平安書計今已
過葉縣矣女子六月初已歸李德素家家弟知命欲將
小子及乳母附一蘇堅宣義船至荆南卽謀泝峽以來
但未得近音耳公代者為誰有音問否黃甘可食未書
後三百顆甚引領也到蜀中來嘗製錦否有嘉錦欲得

數尺作一豹皮半臂無不固求也彼有木工為作一抽
替藥羅長尺一濶六寸許便可此邦僻陋欲作一藥櫃
半年不能成也寄錢五千告指揮盡數買綿早得一人
送來幸甚須此而寒具周旋也庭堅再拜

錫花青布滂寄一番可寄陸安一笑耳雙井二品并以
黔中都濡鏽數恐十尊前或須也二莊客自此搭船至
貴部告勿久留便令附船至夔夔自託舟楫遠行爾庭
堅再拜

有好棊盤乞一面若只是摺疊者亦佳但要金漆面明
快耳棕籠隨宜為買一擔細事不當數潤長者煩李郎
指畫令一幹吏辦之

庭堅頰首今日欲作記并咒氣法以賓客自晨達莫遂
不得試筆然念不忘也辱手誨審侍奉吉慶為慰所須
咒氣法今遣上幸為達侍郎丈几下大要昨日所道以
神守氣最妙其次用咒令氣常運轉若情念未銷惟誦
白織益心一百遍意自調伏白織益心若持之久常令

人對鏡亦不動也燭下不能多書未能作侍郎啓為致
問無量庭堅頓首監稅承務執事

庭堅頓首昨日辱手誨勤懇并煩錄惠明略樂府感刻
感刻適在郡中食不果卽上答今日又不得一面適方
懷耿耿重承存問荷蒙眷眷之意夾紙殊佳但寫未不
欲久留來人度郡中來人至使臺甚易得寫了卽送潘
大夫達矣庭堅再頓首承務足下

庭堅頓首旅次無佐書吏不能作牋亦同舍能略此瑣

瓚也來日雙借教人當謁稍安集自可杜門并令還直也庭堅再拜

右元祐太史山谷先生黃公庭堅字魯直書簡真蹟四十七帖分五卷紹興乙卯歲予從師九江有同舍吳興沈鎧聲甫每好習黃氏字體設太史真像于書室有手贊在其上贊之辭曰以僧有髮似俗無塵作夢中夢見身外身蓋太史手澤也予於是始知好尚家有藏帖一旦彙得七八幅時展玩之嘉定戊辰予

來中都下第後索寞天街中時貴璫有得罪簿錄者
官第甲乙為次揭囊以鬻而不名其物予外姍姚舜
民者以六萬錢得二囊他物不可悉記中有十九帖
在焉撫然不樂予視之內府圖書表識其上蓋皆紹
興間寶儲而墨妙飄舞神態欲活漫從旁解釋就畀
元直取之又將餘物使自售姚大喜過望羽客劉元
綱時偕行戲語予曰唐崔綽嘗謂護見汝南帖何減
於升第正恨世遺李薦君乃得黃庭堅以歸何憾乎

相與大笑外二十八帖散得之江西諸君子家今皆以紙素高下相從雜禱之通有天及藏書等家全印半印四十有一予聞東坡先生過李公擇濟南始得先生之詩文以為超逸絕塵獨立萬物之表者由是名始振嗟乎豈特詩哉其書法亦由是矣惜乎其清其峭足以表百世而其膏其澤不足以被一時先生蓋於是乎有歎

贊曰詩至江西始別宗派字豈無祖人具有待鶴齋

鶻鍛松寒石怪彼有髮僧尚聞磬款

寶真齋法書贊卷十四

欽定四庫全書

寶真齋法書贊卷十五

宋 岳珂 撰

宋名人真蹟

黃魯直先王賜帖

四帖並行書第一第四帖各六行第二帖十四行第三帖四行

來日無他能回車馬至騏驥甚惠仲謀延款之意甚勤
不肖亦欲承教也踞邀恐悚庭堅頓首上伯時親家兄

十日

庭堅頓首遠辱惠書并寄蜀牋極荷勤懇都下匆匆人
事畧不辨了眼前閱歲月如流耳以此音記不時想不
以此為恩意疎密也即日官下何如頗得日力問學有
同僚共文史之樂否令叔比數得安問然意思頗有生
事自累之嗟令弟每相見于仲謀家意氣疎爽甚可愛
也未緣會面千萬加重謹奉狀庭堅再拜景善主簿仁
弟十一月十三日

非物有所須因來示諭欲寄筆墨適春修行日有公家

事冗甚別因監司行寓書并信矣庭堅頓首

庭堅頓首相與有瓜葛又世舊今後惠書可不煩作公
銜也當路諸公頗能相推挽薦章有幾人矣因書一二
疏之庭堅頓首

右先王故藏紹興所賜山谷騏驥蜀牋北物世舊四
帖真蹟一卷縫有內府書印三末有紹興小璽一始
先生在兵間獨以垂意文藝稱字尚蘇體室有鄴架
故奸臣特忌之不與他將比當己未初定盟時金人

歸我河南地高皇旣議偃兵徧賜諸候大帥宸翰先
王始得喬潭舞劍賦次得諸葛亮等屯田三事皆寓
隆指珂幼聞之諸父言他賜尚多上亦聞先王好書
帖嘗因近璫宣諭密賜蘇黃等墨蹟中更家禍皆就
散軼惟舞劍一賦藏先兄吏部甫家其餘雖件目亦
不復可省憶矣珂每竊慨歎謂帖固不得而見而先
王寵褒雅尚亦無容少存風微耶紹定戊子五月客
有自浙右來攜此帖見信初觀楮墨特與他異又見

印識如新亦止疑其貴臣家落遺者閱至卷尾乃有
四半印存于鸞鶴縹卷之右腕其文則曰鎮南留後
清遠鎮寧崇信武勝定國五節度正先王所佩者不
知流落至何所而今日乃復獲之驚喜三歎繼以感
泣於虞予收帖字半生矣王氏之青氈衛公之故物
顧乃一旦自比于象罔之求珠而復還于漂搖之毀
室是非天而孰為之耶此一帖也使太史之網羅放
失皆幸而出于無心則子孫之所不及知史牒之所

不及紀又可殫見耶泣而贊之以志復獲之喜

贊曰賜帖不知其幾而今獲其一四印之錯出百年之湮鬱神呵鬼護見此遺物嗚呼此固先德之所寓而匪止于絕世之名筆既軼而獲比繡質子孫守之謹勿失

黃魯直覺民讀書帖

行書十六行
尾批一行

覺民弟得書知侍奉叔孀恭勤子職同新婦二郎五郎八郎九郎八娘安勝甚慰遠思審不利秋官得失蓋有

奇偶但要偷閒不忘學耳惟此一事身當潤澤又為子孫之基不可不勉也讀書要不雜每一書自初至終日讀得一板歲計之亦功多雜讀雖多終無功也漢儒多白首專一經皆成大儒蓋書在精不在多也念二弟所要文字及詩已具報之二郎開歲已十四想已學作文字陳隱夫必能糾率諸兒讀書閒時更自為講解為佳諸甥皆有性格誰最精慧因讀報及雙連之慶計當在房下要早教道以成天子之美南

北阻遠未有會集期但懷想千萬加愛不見兄庭堅
寄

睦相並附起居

山谷勸其弟姪讀書一帖中三致意焉丁寧懇切惟恐
其怠蓋非獨私其弟姪而已凡厥後學皆當敬佩斯言

永以為訓隆興癸未臘日華陽老人張綱書

行書
五行

讀書本以索理明道其緒餘則為文章至于文章決科
尤其粗者余覽黃公家問至謂得失繫于奇偶而學終

不可忘使人繫節稱善回視韓文公讀書城南詩多媿

辭矣張駒題

行書
六行

右山谷先生讀書帖真蹟一卷張章簡綱等二跋題
其後寶慶丁亥十一月予在京口得之張氏子蓋金
壇故家

贊曰學以進乎道不止于決科也厭飫優柔貴精不
貴多也得失奇偶固未如之何也指端而言所以勉
其切磋也三致意于丁寧式爾心之說也因私淑以

做諸後學又有以見前輩用心之不願也

黃魯直食麵帖

行書
九行

今日早食麵及麩飯各能酌中一杯自病來未始如此也承續寄藥感刻忽憶堯夫在相府時夏秋病暴下至頽昌猶不寧服附子黃耆竹瀝湯乃已此佳也堅腸散不知甚處合來乃咬咀藥耳有虢州赤石脂否因檢藥惠黃耆二兩庭堅再拜

涪翁書大率豪逸放肆不純用古人法度嘗稱杜周有

言三尺法安出哉前王所是著為律後王所是疏為令
以此論書而東坡絕倒雅意主于不俗有戈戟縱橫之
狀不得已焉耳今觀此帖乃能收斂以就規矩本心之
所形也良可寶云嘉定十四年七月丙子鄞川袁燮題

行書
九行

右山谷先生食麪帖真蹟一卷紱齋袁公燮跋其後
前藏書家四印後有袁氏二印寶慶丙戌三月得之

京江

贊曰山谷書法本于天才變而成家如萬壑崖骨瘦
氣清霜寒籟哀故其言曰法安出哉我師我心奚彼
之儕今觀此書自葉而發斂其角圭以復成才規矩
崛奇闢機闔開故其跋曰自本心來誰其知言嘻噫
絜齋

黃魯直張處士帖

行書
七行

張處士得所寄筆六種甚所功恨物材未極佳耳楊仲
穎先輩報張通處士

右山谷先生張士帖真蹟一卷筆工而以張處士稱
豈唐世宣州諸葛流耶其必有以得此矣帖得與真
一詩同時

贊曰唐世稱不擇筆而妍捷者惟虞與裴豈以先生
翰墨之體而猶致恨于物材然而取妍命捷要必有
所有來世所共詫以為不根之奇是固務實者之所
咍也

黃魯直一笑帖

行書
六行

不厭因其求書寓題紙尾他日五湖四海間相見回思

此時亦足握手一笑也

案此帖上有脫文跋中攷之今仍原本

右山谷先生一笑帖真蹟一卷慶元庚申予在姑孰
得此帖子書馭仲宜家卷端已不全莫知其為何帖
有歐陽氏藏書二印

贊曰帖字三十蹟如濕帛古其逢驚啜泣公來姑孰
甫翔集書翰從容豈遑及此帖之獲雖此邑時猶可
疑蠹誰葺至寶道傍世收拾乃以齧殘棄緗笈五湖

浪卷四海立墨風雨中起蚊蟄

黃魯直湯方蔬法帖

行書十
七行

真珠菜淨濯去腥氣入葱白數寸椎薑一塊椒數粒沸湯緋過研五味齋醋食之甚佳櫻花剝去皮及莖幹取成塊者湯中煮令熟鍊薤油炒令香葱薑椒醋水相半沸微入鹽甚美比之二種菜食之殊佳漫錄上庖堅頓首

荔枝湯 擘生荔枝肉別貯其自然汁以水解白沙蜜

漸入和合味相得卽并荔枝肉上火煮減半以苑合貯
之計客數人一勺又入入湯小半盞煎沸用紗囊成龍
腦先撲熱盞乃注湯

餘甘湯 餘甘用一種大如李皮皴肉黃赤者沙盆中
微擦去皮乃以麝薑沙鉢細磨入用半水盞四人用炙
甘草一寸同煎久之亦用龍腦囊撲熱盞乃注湯大率
人不過餘甘一枝

右山谷先生湯方疏法真蹟一卷帖書與雜帖同出

御府中有小壘欵縫而四種方獨殿故予持表而出
之

贊曰湯以濡唇蔬以適口撫蒸腸而有驚奚龍腦之
猶取予方筭箴是茹藥茶是友發遺帖而一笑正恐
楊妃之百驛未足以比庾郎之三韭也

黃魯直蹇驂帖

行書
六行

蹇驂材力下中奉策周旋不能百里蒙被豹飾文采蔚
然維鶉濡翼國風所刺僕人圉師一日三褫不堪龍象

之任僅為麒麟之檀顧影長鳴畏我同早

右山谷先生蹇驂帖真蹟一卷觀帖之語先生意殆
必有謂惜也其不及聞也帖與趙清憲帖同得之王

氏

贊曰世固有飾其外而忘其中被服以為容而用之
弗克又奚止一蹇驂哉予故因遺墨以三省吾身正
恐自墮于黔技之窮而何暇以謂夫懂懂也

黃魯直煎茶賦帖

楷書大字五十八行前題一行
尾記八行案前題一行原闕

洶洶乎如澗松之發清吹皓皓乎如春空之行白雲
主欲眠而同味水茗相投而不渾苦口利病解膠滌昏
未嘗一日不放箸而收茗碗之勲者也余嘗為舍弟嗣
直淪茗因錄其雪煩破睡之功爲之甲乙建溪如割雙
井如撻日鑄如劈其餘苦則辛螫甘則底滯嘔酸寒胃
令人失眠蓋亦不足與議或曰無甚高論敢問其次浩
翁曰然則味江之羅山巖道之蒙頂黔陽之都濡高株
瀘川之納溪梅嶺夷陵之壓甌臨邛之火井皆向以薦

兔褐之甌淪魚眼之鼎者也或者又曰寒中瘴氣莫甚于茶或濟以鹽勾賊破家滑竅走水又況鷄蘇之與胡麻涪翁于是酌岐雷之醪醴參伊聖之湯液斯附子如博投以熬葛僊之聖去藪而用鹽去桂而用薑不奪若味而濟以草石之良所以固太倉而堅作強于是保松實胡桃包鴨跗菴摩以濟味折菊英水蘇濯勃芻薜蘿以為芳前四後四才用其一少則美多則惡發揮其精神又益于咀嚙蓋失匠無可棄之材太平非一世之略

厥初貪味傳，永遠化湯餅。至于中夜不眠，耿耿既作温

濟

案集本既作温，齊句下有殊，可屢飲。如以六經濟三尺法，雖有除治與人安樂，實至則煎去，則就榻不遊。

軒后之華胥，則化莊周之蝴蝶。與此迥異。贊中所謂干賦之尾，與他本異。莫詳其孰是者，今並仍原本。曰

饗四五得枕，而臥夢為蝴蝶，而飛去。

元符三年八月丁未，阻雨羌峽中，試嚴永棗核筆，以銷飽懣。此書似王定國，而差有意味。

右山谷先生煎茶賦真蹟一卷，是賦之書，予嘗見數本文，亦有稍不同者。今字體差清謹，豈先生試筆適

意作耶帖故予舊家物不知所從來

贊曰恭雖以樂煎斯失正味字託以筆試斯失正體以先生而比王定國抑未知其何似于賦之尾與他本異又莫詳其孰是要皆知乎識者之議敬藏以俟

黃魯直真一酒詩帖

行書六行
尾記三行

撥雪披雲得乳泓
蜜蜂又欲醉先生
稻垂麥仰陰陽足
器滌泉新表裏清
曉日著顏紅有暈
春風入髓散無聲
平生真一東坡老
卻作青州從事名

蘇文忠歸穎帖

行書
九行

迨既忝薦赴省試遂可就親雖叔弼尚在疚想可別令人主婚已令子由咨稟彼此欲及時了當想蒙開許也
癸丑三月十五日令時題

右山谷先生歸穎帖真蹟一卷趙德麟跋戊子二月
得之錫山

贊曰事師之情期以百世言雖不多意則獨至識以
歲月越王之孫武時覽觀用攷大倫

東坡真一法酒詩後題云予能作蜜酒格味與真一相

亂

右山谷先生所錄東坡真一酒詩帖真蹟一卷韶定
戊子三月得于高平范氏有藏書家印六字體特飄
逸過于平時蓋得意之蹟云

贊曰以蜜為酒助于東坡託詩以傳百世不磨然而
濁為賢而清為聖泛為醪而盎為鬱自古而降厥名
孔多要皆不以甜稱惟少陵昌黎始有如蜜若飴之

歌豈時人酸鹹之嗜大槩畧同予固未辨其趣之如何也

黃魯直詩藁帖

八帖並行書第一第六帖各十四行第二第四帖各十三行第三帖

八行第五帖三十五行第七第八帖各五行

次韻吳可權題餘干縣白雲亭

遇句屢仆趣處助
蒼聚去政處注

曩誰築孤亭勝日有感過永懷劉隨州因榜白雲句遺
老不能談新陳忽成屢綠陰斤斧盡華屋風雨仆吳候
七閩英宰縣有真趣弦歌解民愠根節去吏蠹材收佛

宮餘工有子來助屢成燕雀賀水滿鳧鴈翥四海名士
來一笑佳客聚雲與碧山留雲隨清江去斯須成蒼狗
皆道不如故至人觀萬物誰有安丘處寄語吳大令但

遣糟牀注

次韻明略奉陪吳明府燕白雲亭

弦筵連船天
妍適然還先

江淨明花竹山空響管弦風生學士塵雲繞令君筵百
越餘生聚三吳遠接連庖霜刀落鱸執玉酒明船葉縣
飛乘烏壺公謫處天酌時多暴謔舞屬更成妍惟我孤

登覽觀詩未究宣空餘五字賞文似雨京然醫是肱三
折官當歲九遷老夫看鏡罷衰白敢爭先

奉答明略見寄長短句

離亭
宴

十載樽前談笑天祿故人年少可是陸沈英俊地看郎
瑣牕批詔此處忽又相逢潦倒禿翁同調西顧郎官湖
渺東看庾樓人小短船絕江空悵望寄得詩來高妙夢
去倚君傍蝴蝶歸時清曉

南樓書事

四顧山光接水光
凭欄十里芰荷香
清風明月無人管
併作南樓一味涼

畫閣傳觴客十客
透風透月兩明軒
南樓盤礴三百尺
天上雲居不居言

勢壓湖南可長雄
曾吞雲夢略從容
北船未嘗覩巨麗
複閣重樓天際逢

武昌參佐幕中畫
我亦來追六月涼
老子平生殊不淺
諸君少住對胡牀

庭堅承榮緒節推惠示沿檄崇陽道中六詩老孀不能
追韻輒自取韻奉和

頭陀全盛時宮殿梯空級城中望金碧雲外僧臙臙人
亡經禪盡屋破龍象泣惟有簡栖碑文章巋然立 右
頭陀寺

蟠空作風雨發地鳴鼓吹日晴四無人聲在高林際伊
優兒女語蹇淺市井議我欲抱七弦寫此以卒歲 右
道中聞松詩

俗物常偏塞令人眼生角永懷洛陽人論詩談畫壁青
山吐秋月阻作南樓客但歌靡盬詩賞此無瑕壁 右
中秋山行懷子興節判

邑下羹不和幕中柱調護紛爭非士則各使捐細故頗
憶都參軍能令公喜怒應知鞅掌車歷盡崔嵬路 右
再登蓮荷嶺懷君澤知錄

張公少為令愍俗有遺書左取洞庭橘右擔彭蠡魚歌
奔中夜女歸抱十年雛借一韻近歲多儒學仁風似有初

右崇陽道中

咸寧走蘆子終日喬木陰太丘心灑落古松韻清深聊
將不俗耳靜聽無弦琴非今豪部律而獨可人心 右
晚發咸寧行松徑至蘆子

戲答歐陽誠發奉議謝予送茶長歌

歐陽子出陽山山奇水怪有異氣生公突兀熊豹顏

此案

句下原本缺
二十六字

音者蒼龍壁官焙香涪翁口贈口口口口

許詩情合得嘗卻思翰林來鑽光口口口口口直相

千萬不啻過愛公好詩口能多口口口有更橫戈奈此

千思百戰何

案黃庚堅集載此詩生公句下云飲如江入洞度壘詩成十手不供寫老來抱璞向

涪翁東坡元吳知音者官涪香句下焙翁投贈非世味旬許詩情合得嘗卻思翰林來餽光祿酒兩家人鏗共寒光余乃案敢比東坡有如玉盤金叵羅直相千萬不啻過愛公好詩又能多老夫何有更橫戈云云原本闕遺過半因此書所載皆據當時之墨蹟故不復增入正文後皆做此

奉和榮緒節推之字四韻

紛紛不可耐君子有憂之鞅掌誠口口口似怨詩顏

波看砥柱濁水得摩尼口口口葉剗心只有皮案黃庭堅

集載此詩第二聯云鞅掌誠莊語賢勞似怨詩
第四聯云知我無枝葉剗心只有皮附誌于此

奉謝榮緒割鮮見貽

何處驚麕觸禍機煩公

案原闕二字

割鮮肥口口口病新開

肉糲飯寒鮮得解圍

案黃庭堅集載此詩云何處驚麕觸禍機煩公割鮮肥秋來多

病新開肉糲飯寒菹得解圍菹字與此異今從原本

右山谷先生詩藁真蹟凡九幅論江西詩派先生為

稱首觀其鈔斷天巧磅礴萬象一字不苟作謂詩非
徒工詎不信然舊人紹興御府卷尾著小璽縫有內

府印八藏事家印亦八嘉定戊辰歲九月得之豫章
蔡士美

贊曰句法之奇日鍊月鍛烏輕之過疾詎穩驢上之
推敲未判長吉之心欲嘔彌明之息猶歛天巧呈露
風期汗漫予方遡詩派而未能所以揜斯卷而三嘆
也

黃魯直催繡詞帖

行書
四行


前歲迷藏花柳恰恰如今時候諸事幾時快鏡中羸得

清痰生受生受更被養娘催繡 歸田樂令

右山谷先生催繡詞帖真蹟一卷先生平生語莊此
帖故遊戲耳觀其序晏小山詞有曰余少時間作樂
府使酒玩世道入法秀獨罪余以筆墨勸淫于我法
中當下犁舌之獄其悔雕篆至矣此豈自放毫楮間
三生結習猶有未忘者耶書出衆帖中亦別而繫之
者

贊曰詞以寓意何適作理於戲翰墨亦或張弛此篇

所傳觀蜡之樂樂而不淫庶幾在此



寶真齋法書贊卷十五